



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri:** KSC-BC-2018-01  
**Vendosi:** Gjykatësi i vetëm  
Gjykatës Nikola Giju  
**Administratore:** Dr. Fidelma Donlon  
**Data:** 7 shtator 2020  
**Gjuha:** Anglishte  
**Klasifikimi:** Rreptësisht konfidencial dhe *Ex Parte*

---

**URGJENT**

**Vendim që autorizon sekuestrim**

---

**Prokurori i Specializuar**

Xhek Smith

**GJYKATËSI I VETËM**<sup>1</sup> ka marrë nga Prokurori i Specializuar në mënyrë rreptësisht konfidenciale dhe *ex parte* “Kërkesë të Prokurorisë për lëshimin e një urdhri për sekuestrimin e dokumenteve” (“kërkesa”), parashtruar më 7 shtator 2020 dhe në vijim jep vendimin e vet.

## I. HISTORIKU PROCEDURAL

1. Më 7 shtator 2020, Zyra e Prokurorit të Specializuar (“ZPS”) dorëzoi një kërkesë rreptësisht konfidenciale dhe *ex parte* për sekuestrimin e dokumenteve që aktualisht besohet se janë në posedim të Organizatës së Veteranëve të Luftës të Ushtrisë Çlirimtare të Kosovë (“OVL-UÇK”).<sup>2</sup>

## II. PARASHTRIME

2. ZPS-ja parashtron se më 7 shtator 2020, OVL-UÇK-ja pretendoi se kishte marrë një paketë që përmbante një numër të madh dokumentesh për të cilat pretendohet se kanë lidhje me Task Forcën Hetimore Speciale (“TFHS”) dhe/ose Zyrën e Prokurorit të Specializuar (“ZPS”), ndër të cilat kopje të kërkesave për bashkëpunim dhe të dhëna për dëshmitarë (“dokumente”).<sup>3</sup> Gjithashtu, ZPS-ja parashtron se qasja e paautorizuar në këto dokumente dhe shpërndarja e paautorizuar e tyre përbëjnë rrezik të mundshëm të menjëhershëm për hetimet dhe dëshmitarët.<sup>4</sup>

3. Për këto arsye, ZPS-ja kërkon që gjykatësi i vetëm:

(a) të miratojë kërkesën dhe të autorizojë sekuestrimin e dokumenteve;<sup>5</sup>

---

<sup>1</sup> KSCPR-2018, F00004, Kryetarja, *Vendim për caktimin e gjykatësit të vetëm sipas nenit 33(2) të Ligjit*, 29 maj 2018, rreptësisht konfidencial dhe *ex parte*.

<sup>2</sup> KSC-BC-2018-01, F00120, Prokurori i Specializuar, *Kërkesë urgjente e Prokurorisë për lëshimin e një urdhri për sekuestrimin e dokumenteve*, 7 shtator 2020, rreptësisht konfidenciale dhe *ex parte*.

<sup>3</sup> Kërkesa, para. 1.

<sup>4</sup> Kërkesa, para. 1.

<sup>5</sup> Kërkesa, para. 3(a).

- (b) të urdhërojë Hysni Gucatin (“z. Gucati”) dhe OVL-UÇK-në të mos shpërndajnë më tej dokumentet ose përmbajtjen e tyre;<sup>6</sup> dhe
- (c) të autorizojë ZPS-në si autoritet kompetent për dorëzimin dhe zbatimin e urdhrit.<sup>7</sup>

### III. DISPOZITAT LIGJORE PËRKATËSE

4. Në bazë të nenit 39(3) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar (“Ligji”), me kërkesë të Prokurorit të Specializuar, gjykatësi i vetëm mund të lëshojë urdhra që nevojiten për hetime dhe për përgatitjen e një gjykimi të drejtë dhe të shpejtë.

5. Në bazë të rregullave 31 dhe 37 të Rregullores së Procedurës dhe të Provave para Dhomave të Specializuara të Kosovës (“Rregullorja”), kontrollimi i një personi dhe i pronës së atij personi ose vendndodhjeve apo objekteve të tjera, si edhe sekuestrimi i provave në lidhje me to, mund të autorizohet në qoftë se:

- (a) Ekziston pritshmëri e arsyeshme për respektimin e privatësisë në lidhje me vendet që do të kontrollohen dhe sendet që do të sekuestrohen;<sup>8</sup>
- (b) Në lidhje me sekuestrimin e sendeve, është e domosdoshme të ruhen provat për një vepër penale brenda juridiksionit të Dhomave të Specializuara dhe ekziston dyshim i bazuar se prova të tilla gjenden në atë vendndodhje, mjedis apo objekt;<sup>9</sup>

---

<sup>6</sup> Kërkesa, para. 3(b).

<sup>7</sup> Kërkesa, para. 3(c).

<sup>8</sup> Rregulla 37(2) e Rregullores. *Shih gjithashtu*, KSC-CC-PR-2017-03, F00006, Dhoma e Gjykatës Kushtetuese, *Aktvendim mbi Referimin e Rregullave të Rishikuara të Rregullores së Procedurës dhe të Provave miratuar nga Plenarja më 29 maj 2017, Dhomës së Specializuar të Gjykatës Kushtetuese sipas nenit 19(5) të Ligjit nr. 05-L-053 për Dhomat e Specializuara dhe Zyrën e Prokurorit të Specializuar (“Aktvendim i Dhomës së Gjykatës Kushtetuese të DHSK-së i 28 qershorit 2017”)*, 28 qershor 2017, para. 69.

<sup>9</sup> Rregulla 37(2)(c) e Rregullores.

- (c) Sekuestrimi është i domosdoshëm,<sup>10</sup>
- (d) Sekuestrimi është i pashmangshëm, d.m.th, në rrethanat konkrete provat nuk mund të sigurohen në një mënyrë tjetër dhe duket se sekuestrimi i kërkuar është e vetmja masë e efektshme për nevojat e hetimit;<sup>11</sup> dhe
- (e) Cenimi i shkaktuar në të drejtën e personit për integritet personal, privatësi dhe pronë është proporcional me qëllimin legjitim të hetimit.<sup>12</sup>

6. Në përputhje me rregullën 37(4) të Rregullores, vendimi që autorizon sekuestrimin përfshin: (a) orarin, kohëzgjatjen dhe shkallën e kontrollimit dhe sekuestrimit, duke përfshirë të dhëna për personin ose pronën, vendndodhjen, mjedisin ose objektin në lidhje me të cilat autorizohet masa përkatëse, dhe (b) procedurën e raportimit në lidhje me zbatimin e masës së autorizuar dhe materialin e sekuestruar, në përputhje me rregullën 31(2) të Rregullores.

7. Në bazë të rregullës 39(1) dhe (2) të Rregullores, sekuestrimi duhet të kryhet në prani të personit përkatës, përveçse kur ky person nuk mund të gjendet, ose kur refuzon të jetë i pranishëm gjatë sekuestrimit dhe në qoftë se vonesa në zbatim do të rrezikonte hetimin apo sigurinë ose pronën e një dëshmitari, viktime apo personi tjetër të rrezikuar. Gjithashtu, Prokurori i Specializuar duhet: (a) t'i japë personit përkatës vendimin që autorizon sekuestrimin; (b) ta informojë personin në fjalë për të drejtat e veta; (c) të sigurojë që mbrojtësi i personit të jetë i pranishëm, përveçse kur personi heq dorë nga ushtrimi i kësaj të drejte, apo logjikisht nuk mund të pritët prania e mbrojtësit; dhe (d) të sigurojë praninë e një vëzhguesi të pavarur gjatë kryerjes së sekuestrimit.

---

<sup>10</sup> Rregulla 31(1)(b) e Rregullores.

<sup>11</sup> Rregulla 37(1) e Rregullores. *Shih gjithashtu*, Aktvendim i Dhomës së Gjykatës Kushtetuese të DHSK-së i 28 qershorit 2017, para 62-67.

<sup>12</sup> Rregulla 31(1)(c) e Rregullores.

8. Në rregullën 32(1) të Rregullores përcaktohet se materiali i sekuestruar mbahet, ruhet dhe mbrohet në mënyrën e duhur. Çdo vendim i një paneli për autorizimin e një mase të tillë përmban: (a) procedurën dhe masat paraprake për ruajtjen, mbrojtjen dhe transferimin e materialit të sekuestruar; (b) kohëzgjatjen e mbajtjes së materialit të sekuestruar; dhe (c) udhëzimet dhe afatet për kthimin ose asgjësimin e materialit të sekuestruar.

9. Neni 35(3) i Ligjit parashtron se policia në kuadër të Zyrës së Prokurorit të Specializuar ka autoritetin dhe përgjegjësinë për të ushtruar kompetencat që i janë dhënë policisë së Kosovës sipas ligjeve të Kosovës. Në bazë të nenit 53(1) të Ligjit, të gjitha subjektet dhe personat në Kosovë respektojnë pa vonesë të papërligjur kërkesat për ndihmë, urdhrat ose vendimet e Dhomave të Specializuara. Sipas rregullës 202(2) të Rregullores, gjykatësi i vetëm mund të përcaktojë kushte që i gjykon të nevojshme, ndër të cilat edhe kushtet për konfidencialitetin dhe masat mbrojtëse. Në bazë të nenit 53(1) të Ligjit dhe rregullës 202(3) të Rregullores, urdhra të tillë duhet të përmbushen pa vonesë të papërligjur.

#### IV. DISKUTIM

##### A. KUSHTET E KONTROLLIMIT DHE SEKUESTRIMIT

10. Kërkesa është në lidhje me sekuestrimin e dokumenteve që besohet se janë në posedim të z. Gucati dhe/ose OVL-UÇK-së, sipas informacionit të lëshuar publikisht nga vetë OVL-UÇK.<sup>13</sup> Meqenëse dokumentet u morën në një paketë të lënë në mjediset e OVL-UÇK-së, gjykatësi i vetëm mendon se në lidhje me këto mjedise që ndodhen në adresën Rruga UÇK 77, Prishtinë, Kosovë,<sup>14</sup> mund të ketë një pritmëri të arsyeshme për privatësi. Rrjedhimisht, në lidhje me këto mjedise vlejné garancitë e parapara në Ligj dhe në Rregullore.

---

<sup>13</sup> Kërkesa, para. 1.

<sup>14</sup> Kërkesa, para. 2.

11. Sipas kërkesës, vetë OVL-UÇK-ja, gjatë një konference për shtyp më 7 shtator 2020 pranoi se duket se dokumentet përmbajnë informacion që ka lidhje me hetimet aktuale të ZPS-së, duke përfshirë kërkesat për bashkëpunim dhe informacion në lidhje me dëshmitarë. Për këtë arsye ekziston dyshim i bazuar se zbatimi i masës së kërkuar do të çojë në sekuestrimin e provave dhe materialit që është pjesë e hetimeve të ZPS-së, duke përfshirë hetime për vepra penale sipas nenit 15(2) të Ligjit. Rrjedhimisht, duke marrë parasysh natyrën e këtyre dokumenteve, sekuestrimi i tyre është i domosdoshëm për hetime të tilla, në veçanti për ruajtjen e provave të veprave penale brenda juridiksionit të Dhomave të Specializuara dhe për mbrojtjen e integritetit të hetimit dhe të sigurisë e mirëqenies së dëshmitarëve.

12. Sa i përket kushtit të pashmangshmërisë, gjykatësi i vetëm thekson se sipas informacionit të lëshuar publikisht nga OVL-UÇK-ja, dokumentet janë të shumta dhe përmbajnë informacion të ndjeshëm, që si rregull nuk janë publike. Pavarësisht nga kjo, OVL-UÇK-ja e bëri publike marrjen e tyre në një konferencë shtypi.<sup>15</sup> Këto rrethana të marra së bashku e bëjnë veçanërisht urgjent sekuestrimin, duke qenë se dokumentet nuk mund të sigurohen ndryshe dhe për rrjedhojë sekuestrimi është masa e vetme e efektshme për sigurimin e tyre.

13. Së fundi, në lidhje me proporcionalitetin e cenimit që do t'u shkaktohet të drejtave të z. Gucati ose personave të tjerë të pranishëm në OVL-UÇK kundrejt qëllimit legjitim të hetimit, gjykatësi i vetëm ndër të tjera ka marrë parasysh dhënien në mënyrë anonime dhe spontane të dokumenteve, natyrën e ndjeshme të informacionit në posedim të z. Gucati dhe/ose OVL-UÇK-së, kohëzgjatjen dhe shkallën e masave të kërkuara dhe garancitë që duhen zbatuar.<sup>16</sup> Duke marrë parasysh numrin e dokumenteve, qëllimi legjitim i hetimit është ndjekja penale në tërësi e personave përgjegjës për vepra penale brenda juridiksionit të Dhomave të Specializuara, përfshirë edhe krimet e përmendura në nenin 15(2) të Ligjit. Lidhur me garancitë që

---

<sup>15</sup> Kërkesa, para. 1.

<sup>16</sup> Aktvendim i Dhomës së Gjykatës Kushtetuese të DHSK-së i 28 qershorit 2017, para. 64.

duhen zbatuar, gjykatësi i vetëm rikujton se ashtu sikurse mishërohet në rregullat 31-33 dhe 39 të Rregullores, ZPS-ja ka për detyrë të marrë masa të përshtatshme për mbrojtjen e të drejtave për integritet personal, privatësi ose pronë. Rrjedhimisht, duke kushtëzuar që sekuestrimi të kryhet në përputhje me kushtet e përcaktuara në Rregullore dhe në këtë vendim, gjykatësi i vetëm konstaton që sekuestrimi i kërkuar është proporcional në lidhje me qëllimin legjitim të hetimit.

14. Pasi ka konstatuar se kushtet e lartpërmendura janë plotësuar, gjykatësi i vetëm autorizon kërkesën për sekuestrim duke qenë se kjo kërkesë përmbush kushtet e rregullave 31 dhe 37 të Rregullores.

#### B. ORARI, KOHËZGJATJA DHE SHKALLA E SEKUESTRIMIT

15. Në lidhje me aspektin kohor të kryerjes së sekuestrimit të kërkuar, gjykatësi i vetëm nga një anë merr parasysh urgjencën e masës së kërkuar si pasojë e njoftimit publik të OVL-UÇK-së, natyrën e ndjeshme të informacionit në posedim të OVL-UÇK-së dhe kohën që i duhet ZPS-së për organizimin e sekuestrimit që ka kërkuar dhe nga ana tjetër pritshmërinë e arsyeshme të z. Gucati për privatësi si edhe nevojën për mbikëqyrje gjyqësore të zbatimit të këtyre masave. Rrjedhimisht, gjykatësi i vetëm gjykon se për kryerjen e sekuestrimit të kërkuar mjaftojnë pesë ditë duke filluar nga lëshimi i këtij vendimi.

16. Sekuestrimi i kërkuar duhet të kryhet vetëm për: (i) materialin që z. Gucati dhe/ose OVL-UÇK morën në mëngjesin e të hënës, 7 shtator 2020; dhe (ii) çfarëdo materiali të ngjashëm që ka lidhje e që mund të merret midis lëshimit të këtij vendimi dhe kryerjes së sekuestrimit të kërkuar.

#### C. RAPORTIMI MBI KONTROLLIMIN DHE SEKUESTRIMIN

17. Në përputhje me rregullat 31(2) dhe 37(4)(b) të Rregullores, ZPS-ja duhet të raportojë në lidhje me zbatimin e masave të kërkuara. Duke marrë parasysh kohën që nevojitet për përgatitjen e raportit pas zbatimit të masave të kërkuara, ZPS-ja duhet të

dorëzohet një raport brenda 14 ditësh nga kryerja e sekuestrimit të kërkuar, ose brenda 14 ditësh nga përfundimi i periudhës pesëditore të përcaktuar për kryerjen e sekuestrimit të kërkuar, në cilëndo datë të mëhershme. Raporti duhet të përmendë (i) datën, orën, kohëzgjatjen, vendndodhjen, shkallën dhe rrethanat e sekuestrimit dhe (ii) përmbushjen e kushteve të rregullës 39 të Rregullores.

#### D. MBAJTJA, RUAJTJA DHE MBROJTJA E MATERIALIT TË SEKUESTRUAR

18. Gjykatësi i vetëm e konsideron të nevojshme që ZPS-ja të ruajë, mbrojë dhe transferojë materialin e sekuestruar në përputhje me procedurën standarde të kronologjisë së ruajtjes së dokumenteve. Në lidhje me këtë, ZPS-ja duhet të marrë masa të përshtatshme për mbrojtjen e materialit të sekuestruar nga humbja, qasja e rastësishme apo e paautorizuar, ndryshimi, shpërndarja ose asgjësimi. ZPS-ja duhet t'i paraqesë gjykatësit të vetëm një raport në lidhje me procedurën dhe masat paraprake përkatëse për ruajtjen dhe mbrojtjen e materialit të sekuestruar.

19. Gjykatësi i vetëm konsideron se një periudhë katërmujore nga kryerja e sekuestrimit të kërkuar është e mjaftueshme për vlerësimin e rëndësisë së materialit të sekuestruar. Në qoftë se gjykohet që ky material është i rëndësishëm për hetimin ose për procedimin e mëtejshëm, ZPS-ja në përputhje me rregullën 33(1)(b) të Rregullores, e mban materialin deri kur nuk është më i rëndësishëm për qëllimin për të cilin është marrë. Në atë rast, do të duhet që materiali i sekuestruar të kthehet ose asgjësohet në përputhje me rregullën 33(2)-(3) të Rregullores. Në qoftë se materiali i sekuestruar nuk përfshihet brenda objektivit të hetimit për të cilin është marrë dhe nuk është i rëndësishëm për hetimin e çfarëdo vepre penale brenda juridiksionit të Dhomave të Specializuara, atëherë materiali i sekuestruar duhet të kthehet ose të asgjësohet menjëherë në përputhje me rregullën 33(1)(a)(i) dhe (2)-(3) të Rregullores.



E. ZBATIMI DHE DORËZIMI I URDHRI TË KËRKUAR

20. Meqenëse sekuestrimi do të kryhet në Kosovë, gjykatësi i vetëm rikujton se policia në kuadër të Zyrës së Prokurorit të Specializuar ka autoritetin dhe përgjegjësinë për të ushtruar kompetencat që i janë dhënë policisë së Kosovës sipas ligjeve të Kosovës. Rrjedhimisht, sipas rregullës 49(1) të Rregullores, ZPS-ja mund të konsiderohet “autoritet kompetent” i aftë për zbatimin dhe dorëzimin e urdhrave të Dhomave të Specializuara, duke përfshirë edhe sekuestrimin e kërkuar. Rrjedhimisht, gjykatësi i vetëm autorizon ZPS-në që të dorëzojë dhe zbatojë këtë vendim.<sup>17</sup> Sipas nevojës, ZPS-ja mund ta bëjë këtë në bashkëpunim me autoritetet kompetente në Kosovë.

F. MOSHPËRNDARJA E DOKUMENTEVE

21. Duke marrë parasysh natyrën e ndjeshme të dokumenteve dhe rrezikun konkret që shpërndarja e tyre e mëtejshme nga z. Gucati dhe/ose OVL-UÇK-ja mund të përbëjë për sigurinë dhe mirëqenien e dëshmitarëve si edhe integritetin e hetimeve, gjykatësi i vetëm duke u bazuar në nenin 39(3) të Ligjit e konsideron të përshtatshme që të urdhërojë z. Gucati, OVL-UÇK-në dhe cilindo individ tjetër që posedon dokumentet dhe/ose përmbajtjen e tyre që të mos kopjojnë në asnjë lloj mënyre dhe të mos shpërndajnë me asnjë mjet komunikimi, dokumentet ose përmbajtjen e tyre.

V. VENDIM

22. Për arsyet e lartpërmendura, gjykatësi i vetëm:

- a. **AUTORIZON** sekuestrimin e dokumenteve në posedim të Hysni Gucatit dhe/ose OVL-UÇK, në adresën Rruga UÇK 77, Prishtinë, Kosovë, sikurse përmendet në paragrafin 16 më lart;
- b. **AUTORIZON** ZPS-në që ta bëjë të njohur këtë vendim aq sa është e përshtatshme dhe e domosdoshme për zbatimin e tij; dhe

---

<sup>17</sup> Me njoftimin e Prokurorit të Specializuar për këtë urdhër, transmetimi i urdhrit konsiderohet i kryer në përputhje me rregullën 49(1) të Rregullores.

- c. **URDHËRON** Hysni Gucatin, OVL-UÇK-në dhe cilindo individ tjetër që posedon dokumentet dhe/ose përmbajtjen e tyre të mos kopjojnë në asnjë lloj mënyre dhe të mos shpërndajnë me asnjë mjet komunikimi dokumentet dhe përmbajtjen e tyre.

23. Meqenëse sekuestrimi do të kryhet në Kosovë, gjykatësi i vetëm **AUTORIZON** ZPS-në të dorëzojë dhe zbatojë këtë vendim sipas paragrafëve 13, 15 dhe 20 të përmendur më lart dhe në përputhje me rregullën 39 të Rregullores.

24. Pavarësisht se ku do të kryhet sekuestrimi, gjykatësi i vetëm:

- a. **URDHËRON** ZPS-në të raportojë mbi kryerjen e kontrollimit dhe sekuestrimit brenda 14 ditësh nga kryerja ose brenda 14 ditësh nga përfundimi i periudhës pesëditore paraparë për zbatimin, në cilëndo datë të mëhershme, në përputhje me paragrafin 17 të këtij vendimi;
- b. **URDHËRON** ZPS-në të mbajë, ruajë dhe mbrojë materialin e sekuestruar dhe të raportojë mbi procedurën dhe masat paraprake për ruajtjen dhe mbrojtjen në përputhje me paragrafin 18 të këtij vendimi; dhe
- c. **URDHËRON** ZPS-në të vlerësojë rëndësinë e materialit të sekuestruar brenda katër muajsh nga kryerja e sekuestrimit dhe të mbajë, kthejë ose asgjësojë materialin e sekuestruar sikurse përshkruhet në rregullën 33 të Rregullores, në përputhje me paragrafin 19 të këtij vendimi.

25. Gjykatësi i vetëm paralajmëron Hysni Gucatin ose cilindo individ tjetër që posedon dokumentet dhe/ose përmbajtjen e tyre, që në qoftë se ata pengojnë zbatimin e këtij vendimi ose shkelin kushtet e tij, në bazë të nenit 15(2) të Ligjit kjo përbën veprë penale sipas Kodit Penal të Kosovës 2019, nr. 06/L-074.

/nëshkrim/

**Gjykatës Nikola Giju**

**Gjykatës i vetëm**

E hënë, 7 shtator 2020

Në Hagë, Holandë.